

平鄉縣志卷十 藝文上

平鄉縣知縣靈川蘇 性禾村纂輯

教諭霸州吳曾榮泐生

參定

訓導常山呂有志荔菴

文以載道其佳者可以炳日星而昭河漢若道不足而強
言正承叔所謂草木之榮華鳥獸之好音奚取焉平邑書
闕有間湮沒者何可勝道然或因時紀事或撫景興懷其
可傳者亦復不少謹擇其尤雅者彙而輯之或亦道之所
不廢云志藝文

平鄉縣志卷十

藝文上

平鄉縣知縣靈川蘇

性禾村纂輯

教諭霸州吳曾榮沛生

參定

訓導常山呂有志荔菴

藝文

隋

刺史前平鄉縣令劉曠本傳

隋書

劉曠不知何許人也性謹厚每以誠恕應物開皇初爲平鄉令單騎之官人有爭訟者輒丁寧曉以義理不加繩劾

各自引咎而去所得俸祿賑施窮乏百姓感其德化更相
篤勵曰有君如此何得爲非在職七年風教大洽獄中無
繫囚爭訟絕息囹圄生草庭可張羅及去官吏人無少長
號泣於路將送數百里不絕遷爲臨潁令清名善政爲天
下第一尚書左僕射高潁言其狀上召之及引見勞之曰
天下縣令固多矣卿能獨異於衆良足美也顧謂侍臣曰
若不殊獎何以爲勸於是下優詔擢拜莒州刺史

唐

唐宰相前平鄉尉張嘉貞本傳

唐書

張嘉貞字嘉貞本范陽舊姓高祖子吒仕隋終河東郡丞
遂家蒲州爲猗氏人以五經舉補平鄉尉坐事免長安中
御史張循憲使河東事有未決病之間吏曰若頗知有佳
客乎吏以嘉貞對循憲召見咨以事嘉貞條析理分莫不
洗然循憲大驚試命草奏皆意所未及他日武后以爲能
循憲對皆嘉貞所爲因請以官讓后曰朕甯無一官自進
賢耶召嘉貞見內殿以簾自鄣嘉貞儀止秀偉奏對侃侃

后異之因請曰臣草莽之人未覩朝廷儀陛下過聽引對
禁近今天威咫尺若隔雲霧恐君臣之道有未盡也后曰
善詔上簾引拜監察御史擢循憲司勳郎中酬其得人累
遷兵部員外郎時功狀盈几郎更不能決嘉貞爲詳處不
閱旬廷無稽牒進中書舍人歷梁秦二州都督并州長史
政以嚴辦吏下畏之奏事京師元宗善其政數慰勞嘉貞
自陳少孤與弟嘉祐相恃以長今爲鄴州別駕願內徙使
少相近冀盡力報死無恨帝爲徙嘉祐忻州刺史突厥九
姓新內屬雜處太原北嘉貞請置天兵軍綏護其衆卽以

爲天與使明年入朝或告其反按無狀帝令坐告者嘉貞
辭曰國之重兵利器皆在邊今告者一不當卽罪之臣恐
塞言路且爲未來之患昔天子聽政於上聵賦矇誦百工
諫庶人謗今將坐之則後無繇聞天下事遂得減死天子
以爲忠且許以相嘉貞因曰昔馬周起徒步謁人主血氣
方壯太宗用之能盡其才甫五十而歿向使用少晚則無
及已陛下不以臣不肖必用之要及其時後哀無能爲也
且百年壽孰爲至者臣常恐先朝露死溝壑誠得效萬一
無負陛下足矣帝曰第往行召卿及宋璟等罷帝果欲用

嘉貞而忘其名夜召中書侍郎韋抗曰朕嘗記其風操而
今爲北方大將張姓而複名卿爲我思之抗曰非張齊正
乎今爲朔方節度使帝卽使作詔以爲相夜且半因閱大
臣表疏舉一則嘉貞所獻遂得其名卽以爲中書侍郎同
中書門下平章事遷中書令居位三年善傳奏敏於裁遣
然強躁論者恨其不裕帝數幸東都洛陽主簿王鈞者爲
嘉貞繕第會以贓聞有詔杖之朝堂嘉貞畏巖染促有司
速斃以滅言祕書監姜皎得罪嘉貞希權幸意請加詔杖
已而皎死會廣州都督裴仙先抵罪帝問法如何嘉貞復

援皎比張說曰不然刑不上大夫以近君也士可殺不可辱向皎得罪官三品且有功若罪應死卽殺獨不宜廷辱以卒伍待也况勲貴在八議乎事往不可咎卽先豈容復濫哉帝然之嘉貞退不悅曰言太切說曰宰相時來則爲非可長保若貴臣盡杖正恐吾輩及之渠不爲天下士君子地乎初嘉貞在兵部而說已爲侍郎及皆相說位其下議論無所讓故說不平未幾嘉祐拜金吾將軍兄弟要近人頗憚媚帝幸太原嘉祐以賊聞說誅嘉貞素服待罪不謁遂出爲幽州刺史說代其處嘉貞銜悔謂人曰中書令

幸二員何相迫耶踰年爲戶部尚書益州長史判都督事
詔宴中書省與宰相會嘉貞銜說不已於坐慢罵說源乾
曜王峻共平解乃得去明年王守一死坐與厚善貶台州
刺史俄拜工部尚書爲定州刺史知北平軍事封河東侯
及行帝賦詩詔百官祖道上東門久之以疾丐還東都詔
醫馳驛護還卒年六十四贈益州大都督諡曰恭肅嘉貞
性簡疏與人不疑內曠如也或時以此失有嗜進者汲引
之能以恩終始所薦中書舍人苗延嗣呂太一考功員外
郎員嘉靜殿中侍御史崔訓皆位清要日與議政事故當

時語曰令君四俊苗呂崔員其始爲中書舍人崔湜輕之
後與議事正出其上湜驚曰此終其坐後十年而爲中書
令嘉貞雖貴不立田園有勸之者答曰吾嘗相國矣未死
豈有飢寒憂若以譴去雖富田產猶不能有也近世士大
夫務廣田宅爲不肖子酒色費我無是也

元

邑令朱公去思碑記

劉安仁

侯諱文英世爲開州大族襲父爵爲本州長至元三年轉
淇州州同四年除遙授同知管州事兼平鄉縣尹下車之
日園吏以常例供菜茹侯曰昔公儀拔葵且云不可奪園
夫之利况受其供乎遽卽遣之嘗謂治民如牧羊豺狼不
驅欲羊之蕃息不亦難乎乃罷革里正行用信牌催納月
課契外一切無征至元七年奉上命開南和之澧河將通
漕運侯相視地形乃曰此本濡濕之地且農事方殷安可

奪有用之功以興無益之務乎慨然言之於總府遂皆罷役一言有中數縣蒙福河潤九里豈虛語哉賦斂常法以物力爲差或有開一墾之地營半厦之居者有司從而加賦侯素知其弊乃令自今而後增置產業者更不添差至於差遣夫役則量遠近爲之等而輕重不偏矣輸納差稅則驗先後爲之次而停滯得免矣議者謂思猶父母政若神明刻石頌德用垂不朽

邑建三皇廟碑記

太史院
主事 董 樸
龍岡人

聖王之制祀典也有功於民則祀之法施於民則祀之隆古盛時聖人出而有爲於斯世繼天立極功高萬古仁及萬世宜其有祠宇以崇之牲牢以祀之也嗟夫伏羲神農軒轅天下之大聖也成天下之大功立天下之大法措天下於太山之安躋斯民於仁壽之域德澤遠施洋溢乎萬方使天下大都小邑建立祠宇血食百千萬世亦不爲過而歷代以來廟貌未崇奠祀無所聖人何負於人而致然耶方今聖天子在上舉秩廢祀詔天下郡邑皆廟三皇仍

以勾芒祝融風后力牧配享廟庭茲固天地之常經古今之通義千古所未能行聖朝乃能行之三皇之道不憂其不明矣一日平鄉達魯花赤闕帖木兒縣尹據機主簿席榮祖尉王安世等合詞來言曰平鄉古名郡舊無三皇廟吾輩乃卜郡城東北隅爽塏之地鼎新開天之殿又爲從祀之室講誦之堂開天之門牲薦之舍一一嚴備象設禮器皆應圖法經始於丙午之春落成於丁未之秋率諸生釋菜如禮文石已具請余記之余故聞其事而樂爲之書以告來者使有考焉

邑令楊公去思碑

秦 錡

沼水人

潯陽楊君執中儒也由吏進歷淄川簿福山尹皆有善政
今以京倉監來尹平邑勤儉律已誠愛接物教民以孝弟
力田爲本不尚苛細化行俗美治最冠諸邑比鐵官以歲
課未登派鐵於民預貸其賦令議以歲飢民貧豈可復擾
以不經哉具其事上之郡是之遂寢其議所省數千百緡
由是他被檄者亦得免焉丁亥歲飢詔賑粟萬斛仵匪其
人沃粟以水土糲半之令揚言朝廷憂民饑賜以粟也今
粟乃爾恐非恤民意固辭不受使者屈服乃擇粟之佳者